



B N. C
FIRENZE
1070
17





1070. 17





1070. 17
DECLARATION

DV ROY, CONTRE LE
S^r de Soubize, & autres ad-
herants au party des An-
glois.

Publiée en Parlement le 12. Aoust 1627.



A P A R I S,
Par A. ESTIENE, P. METTAYER,
& C. PREVOST, Imprimeurs
ordinaires du Roy.

M. DC. XXVII.
Avec Privilege de sa Majesté.







L OVIS par la grace de Dieu
 Roy de France & de Na-
 uarre , A tous ceux qui ces
 presentes Lettres verront,
 SALVT. Depuis qu'il a pleu à Dieu
 nous appeller au gouuernement de cét
 Estat, nostre conduitte a fait cognoi-
 stre, avec combien de soin nous auons
 trauaillé pour entretenir la paix & la
 tranquillité publique, soit en gardant
 & conseruant entre ceste Couronne &
 les Princes estrangers toute bonne
 amitié, intelligence & correspondan-
 ce, soit employant comme nous auons
 fait diuerses fois en plusieurs endroiets
 & grandes occasions, nostre entremise
 Royale pour assoupir & esteindre les

alterations & differends qui s'estoient émeus entre lefdits Princes : comme aussi en donnant assistance & protection à nos anciens Allicz, lors que nous l'auons iugé necessaire pour les maintenir ou reestablr dans les choses qui leur appartenoiét, afin d'arrester par ce moyen, la suite des troubles que les innouations arriüées en leurs Estats pouuoient apporter. En quoy si nos intentions ont esté recognües bonnes & sinceres, nous estimons aussi que celles que nous auons eu, fondées sur les mesmes considerations de la tranquillité publique & de l'afermissement du repos de nostre Royaume, en contractant diuerfes grandes alliances par le mariage de nos tres cheres Sœurs, sont dignes encores de plus grande recommandation. Mais nous ne pouuons voir sans vn tres-juste sentiment, que la derniere que nous auons faite en An-

gleterre, n'aye pas eu iusques à present le bon succez que nous en auions attendu: Et qu'au lieu d'estreindre de plus en plus comme nous nous estions promis, le nœud de l'ancienne amitié qui estoit entre ces deux Couronnes, il soit arriué qu'apres les infractions notoirement faites de la part d'Angleterre, aux articles du mariage de nostre treschere Sœur avec le Roy de la grande Bretagne, les Anglois soient encor venus assaillir & faire descente en l'Isle de Ré, avec nombre de vaisseaux & gens de guerre, sans nulle cause, fondement, pretexte ny declaration. Et comme nous voyons que pour donner cours à leurs injustes desseins, ils ont déjà pratiqué aucuns de nos sujets, ont enuoyé le S^r de Soubize en nostre ville de la Rochelle, pour induire les habitans d'icelle à se joindre à leur party, & qu'ils continuēt les mesmes menées & pratti-

ques à l'endroit de nos autres subjets de la Religion pretenduë reformée, pour les attirer & engager sous diuers pre-
textes & vaines esperances dans leur vnion : encores que nous voulions croire, que nosdits subjets auront assez de fermeté & de iugemēt pour ne pas se laisser deceuoir & surprendre à semblables artifices : & que considerans que nous les faisons iouir en paix de la liberté toute entiere de l'exercice de leur Religion, du benefice de nos Edicts, & des choses qui leur ont esté par Nous promises, ils sçauront bien cognoistre que ceste entreprise faire par les Anglois, ne peut auoir en effect aucun objet ny fondement qui puisse regarder le bien de leur Religion, mais que c'est vne volōtaire agression contre Nous, contre ceste Couronne, & contre l'honneur de la Nation, pour la defense desquels tous bons François tant Catho-

liques que de la Religion pretendüe reformée , sont également obligez d'exposer leur sang & leur vie enuers & contre tous : Neantmoins afin que nosdits Sujets soient informez de nos intentions sur les occurrences presentes , & qu'ils ne puissent estre circonuenus par les inuentions qui sont employées pour les soustraire de leur deuoir naturel, S Ç A V O I R F A I S O N S, que Nous pour ces causes & autres bonnes & grandes considerations à ce nous mouuans, D E L' A D V I S de la Royne nostre tres-honorée Dame & Mere, de nostre tres-cher & tres-amé Frere vni- que le Duc d'Orleans, des Princes, Offi- ciers de nostre Couronne, principaux Seigneurs & notables personnages de nostre Conseil d'Estat, & de nostre cer- taine science, plaine puissance & au- thorité Royale, A V O N S dit & de- claré , disons & declarons par ces

Presentes signées de nostre main, le Sr
 de Soubize, & ceux de nos Subjets de
 quelque qualité & condition qu'ils
 soient, qui auront adheré, ou qui se
 joindront au party des Anglois, qui les
 fauoriseront & assisteront directement
 ou indirectement, auront accez & in-
 telligence, association & correspon-
 dance avec eux en quelque sorte & ma-
 niere que ce soit, ou qui autrement se
 départiront de l'obeyssance qu'ils nous
 doiuent, Rebelles, Traistres & Perfi-
 des à leur Roy, & Deserteurs de leur
 Patrie, Criminels de leze-Majesté au
 premier Chef, & comme tels decla-
 rons leurs biens, meubles & immeu-
 bles, Offices & Charges à nous acquis
 & confisquez : Et tous les Habitans
 de nos Villes qui adhereront aux en-
 treprises, rebellion & desobeyssance
 des dessusdits, ou qui leur donne-
 ront entrée, passage, refuge, retraite
 & logement

& logement en icelles , & qui les y souffriront & assisteront en quelque sorte que ce soit , leur aideront d'armes , viures & munitions , & autres choses quelconques ; coupables des mesmes crimes , décheus de tous ordres, honneurs , priuileges , franchises , immunitéz & droits qui leur pourroient auoir esté concedez par les Rois nos predecesseurs ou par Nous , sans esperance d'aucun retablissement. Voulans qu'il soit procédé contre - eux selon la rigueur de nos Ordonnances , par emprisonnement de leurs personnes , saisies de leurs biens , rasement & demolition de leurs maisons, sans aucun excepter, degradation des bois & autres choses qui en dépendent , & qu'ils soient décheus du benefice de nos Edicts , mesme du renuoy en nos Chambres créées par iceux, sauf si dans huiët iours apres la pu-

blication faite de ceste presente Declaration és costes de Poictou, Xaintonge & Aulnis, ils ne se départent de la ditte rebellion, & se representent deuant nos Officiers des Villes de Xaintes, Nyort, Fontenay, Broüage, & autres plus éloignées, avec les submissions ordinaires, & que les Villes ne facent les Declarations en tel cas requises dans ledit temps. ET dautant que nous auons recogneu durant les derniers mouuemens, qu'aucuns de nos Subjets de la ditte Religion pretenduë reformée adherans au party des rebelles, ont de coustume d'enuoyer leurs enfans, ou permettent qu'ils aillent porter les armes avec eux, demeurans de leur part en leurs maisons pour les garentir de la rigueur de nos Declarations, Nous voulons pour remedier à tels abus, que les Peres ou les chefs des maisons & familles, soient tenus & reputez pour adhe-

rer au party des ennemis, & qu'ils soient punis en leurs personnes, biens & maisons, des peines mentionnées en ces Presentes, si leurs enfans ou autres parents demeurants ordinairement ou le plus souuent en leurs maisons, & n'ayans autre maison de leur chef que celle de leurs peres & parens, y sont portans les armes, si ce n'est que lesdits Peres ou chefs de familles & maisons, nous seruent actuellement dans nos armées ou ailleurs, & facent telle diligence de retirer leurs enfans ou parens, que nous ayons tout sujet de croire qu'ils n'y ont aucune part. ET pour le regard de tous nos autres sujets de la Religion pretenduë reformée qui demeureront en l'obeyssance & fidelité qu'ils nous doiuent, sans adherer aux desseins des ennemis, & autres prattiques, factions & menées contre nostre authorité, seruice & repos de nostre Estat,

Nous voulons qu'ils iouissent plainement & paisiblement de la liberté de leur exercice, & de toutes les graces & concessions à eux faites & accordées par le feu Roy nostre tres-honoré Seigneur & Pere & Nous, lesquelles nous entendons garder & entretenir inuio- lablement, mettât tous nosdits Sujets de laditte Religion pretenduë reformée, leurs familles & biens, demeurans en leur deuoir, en nostre protection & sauuegarde speciale.

SI DONNONS EN MANDEMENT à nos amez & feaux les gens tenans nos Cours de Parlements & Chambres de l'Edict, que ces Presentes nos Lettres de declaration, ils facent lire, publier & enregistrer, & le contenu en icelles faire garder, obseruer & executer exactement selon leur forme & teneur, mesmes à nos Cours de Parlements, pour le regard de l'exécution & infliction des

peines portées par ces Presentes, pour
raison desquelles Nous leur attribuons
toute iurisdiction & cognoissance pri-
uatiuement ausdites Chambres pour
les cas susdits, dont les coupables sont
indignes & décheus de tous priuileges.
Sans preiudice neantmoins de ceux qui
seront pris par les Generaux & Chefs de
nos Armées, Iuges de nos Villes & Iu-
risdictiōs, les Visbaillifs, Visseneschaux
& Preuoists de nos chers & bien amez
cousins les Mareschaux de France, des-
quels nous voulons que iustice soit fai-
te promptement & sans remise, tant
sur les personnes que sur les maisons &
biens, par ceux qui les auront pris & ar-
restez en quelque lieu que ce puisse
estre, & qu'ils soient punis & chastiez
selon le contenu en ces Presentes, & la
rigueur desdits Edicts & Ordonnances
precedentes faites par les Roys nos Pre-
decesseurs & Nous, & à cette fin que les

procez leur soient par eux faits & par-
 faits selon la iurisdiction à eux attri-
 buée: Enjoignans à nos Procureurs ge-
 neraux & leurs Substituts, de faire tou-
 tes poursuittes & diligences pour ce re-
 quises & necessaires. Mandons aussi
 aux Gouverneurs & Lieutenans gene-
 raux de nos Prouinces, Baillifs, Senes-
 chaux, Visseneschaux, Preuosts de
 nosdits coustins les Mareschaux de Fran-
 ce ou leurs Lieutenants, & tous autres
 nos Iusticiers, Officiers & Sujets qu'il
 appartiendra, de tenir la main à l'exe-
 cution de ces Presentes, faisant saisir &
 arrester, courir sus & tailler en pieces,
 tous ceux de nos Sujets qui feront le-
 uées & armements de gens de guerre
 soit par mer ou par terre, sans nos Com-
 missions seellées de nostre grand sceau:
 C A R tel est nostre plaisir. En témoin
 dequoy nous auons fait mettre nostre
 seel à celdites Presentes. D O N N E' à

Villeroy le cinquième iour d'Aoust,
l'an de grace mil six cents vingt sept: &
de nostre regne, le dix-huitième. Si-
gné, LOVIS: Et sur le reply, Par le
Roy, DE LOMENIE. Et scellées du
grand Seau de circ jaune. Et encor sur
ledit reply est écrit.

*Leuës, publiées & registrées, Oüy & ce
requerant le Procureur General du Roy, pour
estre executées, gardées & obseruées selon leur
forme & teneur, & que coppies collationnées
aux originaux d'icelles, seront enuoyées aux
Bailliages & Seneschaussées de ce ressort,
pour y estre pareillement leuës, publiées &
registrées, gardées & obseruées à la diligence
des Substituts dudit Procureur General, aus-
quels enioinct d'y tenir la main, & certifier
la Cour auoir ce faict au mois. A Paris en
Parlement le 12. d'Aoust 1627.*

Signé, DV TILLET.

1070. 17

2

89 95

1920

Handwritten text at the top of the page, possibly a header or introductory paragraph.

Main body of handwritten text, consisting of several lines of cursive script.

W. T. L. 1811



MC

